

Mensahe 7

**Makaila ni Jehova, nga Walay Kataposang Dios,
sa Mahigugmaong-kalulot, Mga Puangod, ug Pagkamatinumanon Niya**

Basahong Kasulatan: Jer. 2:19; 10:10; 11:20; 20:12;
Lam. 3:22-25; 5:19

**I. Sagad nga ginganlan ni Jeremias ang Dios og Jehova sa mga panon—Jer. 2:19;
5:14; 6:9; 7:21; 9:7, 15, 17; 11:17; 20:12:**

- A. “Si Jehova ang tinuod nga Dios; / Siya ang Dios nga buhi ug ang Haring walay kataposan”—10:10:
1. Nagpasabot ang *Jehova* og “Ako mao ang Ako mao,” nagpaila nga si Jehova ang Walay Kataposan, ang mao kanhi, ang mao karon, ug ang mao sa umalabot hangtod sa hangtod—Exo. 3:14; Bug. 1:4:
 - a. Si Jehova ang naanaa sa Iyang Kaugalingon ug naa sa kanunay nga Dios; naa Siya hangtod sa dayon, nga walay sinugdanan o kataposan—Exo. 3:14.
 - b. Ang *Ako Mao* nagpasabot nga wala Siyay gisaligan kondili ang Iya rang Kaugalingon—Juan 8:24, 28, 58.
 2. Si Jehova ra ang mao, ug motuo gyod ta nga Siya mao—Heb. 11:6.
 3. Isip ang Ako Mao, si Jehova ang malangkobon-sa-tanan, ang realidad sa tanang positibong butang ug sa bisan unsang gikinahanglan sa Iyang katawhan—Juan 6:35; 8:12; 10:14; 11:25; 14:6.
 4. Gawas ni Jehova, balewala ang tanan; Siya ray Mao, ang bugtong Usa nga dunay realidad sa pagkamao—Heb. 11:6.
- B. “O Jehova sa mga panon, nga matarong nga naghukom, / Nga nagsulay sa mga bahin sa sulod ug sa kasingkasing”—Jer. 11:20:
1. Ang ngalang *Jehova sa mga panon* nagpakita nga si Jehova nga Dios mao ang Makagagahom, ang Ginoo sa tanang langitnong panon, ang Komander sa tanang panon—20:12; 30:8; 48:1; 50:18; 1 Hari 22:19.
 2. Si Jehova sa mga panon mao ang Hari sa himaya, ang Kusgan ug Makagagahom; Siya si Jehova sa mga kasundalohan—Sal. 24:8, 10.
 3. Ang Hari sa himaya, si Jehova sa mga panon, mao ang nahingpit nga Tulo-usang Dios nga gipakalawas diha sa madaogon ug moabot nga Cristo.
 4. Isip nagpakatawo, gilansang sa krus, ug nabanhawng Cristo, moanhi ang Hari sa himaya aron manag-iya sa yuta ug batonan kini ingon nga Iyang gingharian:
 - a. Pahunongon ni Jehova sa mga panon ang mga gubat hangtod sa kinatumyan sa yuta; ituboy Siya diha sa mga nasod, ug ituboy Siya dinhi sa yuta—46:9-10.
 - b. Dunay pagbulot-an si Jehova sa mga panon nga magbuot sa tanang nasod, ug naa sa Iyang kamot ang pagbulot-an sa pagtangtang ug pagpahalunag mga hari—Dan. 2:21.
 5. Sa panahon nga nakabos ang pagkasacerdote, gipadayag sa Dios ang Iyang ngalan ingon nga Jehova sa mga panon, nagpakita nga kon naa sa kabos nga kahimtang ang Iyang administrasyon, mogula Siya aron magbuot sa tibuok sitwasyon ug ipadangat ang paghari sa Iyang gingharian—1 Sam. 1:3.

II. “Ikaw, O Jehova, magpabilin man hangtod sa hangtod; / Ang Imong trono gikan sa kaliwatan ngadto sa kaliwatan”—Lam. 5:19:

Mensahe 7 (sumpay)

- A. Sa versiculo 19, giusab ni Jeremias ang iyang posisyon ug anggulo gikan sa iyang kaugalingon ngadto sa Dios, ug gihisgotan niya ang walay kataposang pagkamao ug dili mausab nga pangagamhanan sa Dios.
- B. Napukan ang Jerusalem, nasunog ang templo, ug nabihag ang katawhan sa Dios, apan nagpabilin si Jehova, ang Ginoo sa uniberso, aron magpatuman sa Iyang administrasyon.
- C. Ang pamulong *Ikaw, O Jehova, magpabilin man hangtod sa hangtod* nagpakita nga walay kataposan ang Dios ug dili Siya mausab—v. 19:
 - 1. Dili gyod mausab ang Dios, dili gyod mausab tungod sa mga palibot ug mga sirkums-tansya—Sal. 90:2; Rom. 16:25-26.
 - 2. Dunay mga kausaban sa tanang bahin diha sa ginsakpan sa tawo, apan dili gyod mausab ang walay kataposang pagkamao sa Dios; mao ra Siya hangtod sa hangtod.
 - 3. “Nitawag si [Abraham] sa ngalan ni Jehova, sa Dios nga Walay Kataposan”—Gen. 21:33:
 - a. Sa Hebreohanon ang *Dios nga Walay Kataposan* mao ang *El Olam*; ang El nagpasabot og “ang Makagagahom,” ug ang *Olam* nagpasabot og “walay kataposan” o “eternidad” ug naggikan sa Hebreohanong pulong nga nagpasabot og “pagtabon” o “pagtago.”
 - b. Nagpasabot og kinabuhing dayon ang diosnong ngalan nga *El Olam*—itandi sa Juan 1:1, 4.
 - c. Sa pagtawag ni Abraham ni Jehova, sa Walay Kataposang Makagagahom, nasinati niya ang Dios nga buhi-sa-dayon, sekreto, mysteryoso, nga mao ang kinabuhing dayon.
- D. Ang pamulong *ang Imong trono gikan sa kaliwatan ngadto sa kaliwatan* nagpasabot sa walay kataposan ug dili mausab nga pangagamhanan sa Dios—5:19; Sal. 45:6; 93:2; Bug. 4:2-3:
 - 1. Walay sinugdanan o kataposan ang trono sa Dios; naa ang Iyang trono gikan sa kaliwatan ngadto sa kaliwatan.
 - 2. Diosnon gyod ang sinulat ni Jeremias sa kataposan sa Lamentaciones kalabot sa walay kataposang pagkamao ug dili mausab nga pangagamhanan sa Dios:
 - a. Ang pulong ni Jeremias kalabot sa walay kataposang pagkamao sa Dios ug sa trono Niya lig-ong ilhanan nga sa pagsulat niya sa Lamentaciones natandog niya ang pamatigayon sa Dios.
 - b. Nigula siya sa iyang tawhanong mga pagbati, nakatandog sa persona ug trono sa Dios, ug nisulod sa pagkadios sa Dios.
- E. Sa Bag-ong Jerusalem, hingpit nga ipadayag ang Dios diha sa Iyang persona isip walay kataposang Hari ug diha sa Iyang pangagamhanan isip walay kataposan, dili matarog nga gingharian Niya, kining duha ang dili matarog nga patukoranan sa pagtagad Niya sa Iyang katawhan—Heb. 12:28; Bug. 22:3.

III. “Tungod man sa mahigugmaong-kalulot ni Jehova nga wala ta mangaut-ot, / Kay dili mapakyas ang Iyang mga puangod; / Bag-o kini matag buntag; / Dako ang Imong pagkamatinumanon”—Lam. 3:22-23:

- A. Nagpakita si Jehova ni Jeremias, nga niingon, “Gidani ka Nako pinaagi sa mahigugmaong-kalulot”—Jer. 31:3:
 - 1. Bililhon, walay kataposan, ug taas pa sa mga langit ang mahigugmaong-kalulot ni Jehova ug naghatod ngadto ni Cristo nga bato sa pamag-ang alang sa pagtukod sa Dios—Sal. 36:7, 9-10; 108:4; 118:1-4, 22-29; 136:1, 26.

Mensahe 7 (sumpay)

2. Naghisgot ang Salmo 103 sa kasaysayan sa Dios sa mahigugmaong-kalulot ug mga puangod Niya sa pagpasaylo Niya sa mga sala, pag-ayo, pagtubos, ug pag-atiman sa Iyang katawhan.
 3. Giingnan sa salmista si Jehova, “Sa kadagaya sa Imong mahigugmaong-kalulot / Mosulod ko sa Imong balay”—5:7:
 - a. Maanaa gyod sa mahigugmaong-kalulot sa Dios ang tawong dunay pribilihiyo nga mosulod sa templo sa Bukid sa Sion.
 - b. Sa pagkatinuod, ang pagsulod nato sa templo pagpahimulos na man sa kadagaya sa mahigugmaong-kalulot sa Dios.
 - c. Ang paghisgot sa mahigugmaong-kalulot ni Jehova sa taliwala sa Iyang templo nagpakita nga matandog nato ang Iyang mahigugmaong-kalulot diha sa iglesia.
 4. Nagpadayag ang Salmo 101 unsaon paghari ni Cristo sa yuta uban sa mahigugmaong-kalulot ug hustisya.
- B. Napakyas ang katawhan sa Israel, apan gipreserba sa mga puangod sa Dios ang salin sa Israel aron matuman ang Iyang pamatigayon—Lam. 3:22-23:
1. Mas lalom, mas pino, ug mas dato ang puangod kaysa kaluoy—Rom. 9:15; Sal. 103:8.
 2. Ang puangod nagpasabot sa pagbati sa Dios sa sulod nga naggikan sa mahigugmaong pagkamao Niya—2 Cor. 1:3; Sant. 5:11; Luc. 6:36.
 3. Nianhi si Cristo sa yuta tungod sa maluluy-ong mga puangod sa Dios—1:78.
 4. “Bag-o matag buntag” ang mga puangod ni Jehova—Lam. 3:23:
 - a. Nagpakita ang versiculo 23 nga matag buntag gikontak ni Jeremias ang Ginoo nga mapuangoron.
 - b. Tungod man sa pakigkontak niya sa Ginoo nga nadawat niya ang pulong kalabot sa mahigugmaong-kalulot, mga puangod, ug pagkamatinumanon sa Dios.
- C. Niingon si Jeremias ni Jehova nga, “Dako ang Imong pagkamatinumanon”—v. 23b:
1. Dili mapakyas ang mga puangod sa Dios, kay Siya man ang matinumanon—Sal. 57:10.
 2. Matinumanon ang Dios sa Iyang kaugalingong pulong; dili Siya makalimod sa Iyang Kaugalingon; dili Siya makalimod sa Iyang kinaiya ug pagkamao—2 Tim. 2:13.
 3. Sa pagkamatinumaon sa Dios gitawag ta Niya ngadto sa pakig-ambitay sa Iyang Anak, ug ampingan ta Niya ning pag-apil ug pagpahimulos nato sa Iyang pagkamatinumanon—1 Cor. 1:9.
 4. Ang matinumanong Dios nga nagtawag nato bug-os sab nga magbalaan nato ug hingpit nga magpreserba sa tibuok natong pagkatawo—1 Tes. 5:23-24.

IV. “Si Jehova ang akong pahat, niingon ang akong kalag; / Busa molaom ko diha Niya”—Lam. 3:24:

- A. Ang pulong ni Jeremias kalabot ni Jehova nga atong pahat ug ang paglaom nato Kaniya dunay lami sa Bag-ong Tugon—Col. 1:12, 27:
1. Nagpahimulos si Jeremias ni Jehova ingon nga iyang pahat, ug nilaom siya dili sa iyang kaugalingon o sa bisan unsang butang kondili ni Jehova ra—Lam. 3:24:
 - a. Sa usa ka bahin, nakaamgo si Jeremias nga Dios sa mahigugmaong-kalulot ang Dios, nga mapuangoron Siya, ug nga kasaligan ang Iyang pulong.
 - b. Sa laing bahin, nakaamgo si Jeremias nga kinahanglan gihapon tang mokontak sa Ginoo matag buntag, bug-os nga molaom diha Niya, maghulat Niya, ug motawag sa Iyang ngalan—vv. 23-25, 55.

Mensahe 7 (sumpay)

2. Sa niadto ang salmista sa balaang puluy-anan sa Dios ug naa nay diosnong pananawon ug nakasabot sa iyang sitwasyon, nakaingon siya nga ang Dios maoy iyang pahat hangtod sa hangtod—Sal. 73:17, 26:
 - a. Diha sa balaang puluy-anan sa Dios gitudloan ang salmista nga ang Dios mismo ray himoong pahat niya, ug dili ang bisan unsang butang gawas sa Dios—v. 26.
 - b. Tuyo sa Dios sa mga matinguhaon Niya nga makaplagaan nila ang tanan diha Niya ug dili sila masimang gikan sa hingpit nga pagpahimulos Kaniya.
- B. “Maayo si Jehova alang sa mga naghulat Niya, / Alang sa kalag nga nangita Niya”—Lam. 3:25:
 1. Bisan tinuod, buhi, mapuangoron, ug matinumanon ang Dios, aron masulayan ang Iyang katawhan, sagad nga maglangan Siya sa pagtuman sa Iyang pulong—Sal. 27:14; 130:6; Isa. 8:17; 30:18; 64:4.
 2. Ang paghulat sa walay kataposang Dios nagpasabot nga gitapos nato ang atong kaugalingon; sa ato pa, gipahunong nato ang atong kaugalingon ug ang atong pagkinabuhi, atong pagbuhat, ug atong kalihokan, ug gidawat ang Dios diha ni Cristo ingon nga atong kinabuhi, atong persona, ug atong puli—40:28, 31:
 - a. Kinahanglan makat-on ta sa pagtulon-an nga maghulat sa Ginoo—30:18.
 - b. Karon dili maoy panahon sa kinataposang kahingpitan; busa, maghulat gyod ta sa Ginoo—64:4.
 3. Samtang naghulat ta sa Ginoo, mangita ug motawag gyod ta Niya:
 - a. “Mangita mo Nako ug makakaplag Nako kon mangita mo Nako sa bug-os ninyong kasingkasing”—Jer. 29:13.
 - b. “Tawga Ko, ug motubag Ko nimo ug mosulti nimog dagko ug natagong mga butang, nga wala nimo mahibaloi”—33:3.